



## 望落雨又望好天

仰會望落雨又望好天呢？正聽啊著這句話，心肝肚會試著盡毋合理，毋過想較真兜，正經有道理，因為久無雨，人就會望落雨，雨落久，人又會望好天。總講，人个心情就係跔等天時變去變轉，因為，水對人來講非常重要，係天公無落雨，就會無水好用，該生活愛仰般過啊！反轉來講，係輒輒落雨，該盡多事就無法度做，無事做，就無收入，該生活愛仰般過啊！客家人講晴耕雨讀，喊人好天愛煞猛耕田、棧食糧，落雨天愛好好讀書、增知識。若係常常好天，該就較無讀著書；若係日日落雨，該就絡較無食。可見，想愛做到晴耕雨讀乜愛睺天公个面色。雖然，這講个係農業時代个生活方式，但係，對現下人來講，好天摻落雨天愛分勻來，還係共樣重要。

該儕儕就望風調雨順，該落雨就落雨、該好天就好天，天公敢有法度？佢睺就罅囵！罅囵喔！今年九月尾个風搓來，落恁多雨，過啊忒，新竹差毋多有兩隻零月無落雨，滿哪就燥絲絲，平地種菜个人浴菜浴到毋記得，淺山耕園、種茶个人就還較毋使講咧。一直到十二月頭，正有落較像樣个雨。仰會恁燥呢？敢講，天公變性了係無？佢想，係有天公，佢定著會喊：「冤枉啊！冤枉啊！係你兜自家搥衰自家个，仰做得賴人？」無毋著，仰做得儘採賴天公？係恁自家愛檢討正著啊！其實，臺灣歸年落个雨量無麼个變化，係落雨天變少咧，雨落無勻，有成時一落就連等幾陣大雨，落到「臺灣會沉忒樣」，望毋得好天，有成時又逐日好天，望毋得著半點雨，天時敢完全無好分人參詳？

講去講轉，佢想這隻問題毋係愛問天時，也毋係愛問天公，係愛問恁自家，到底想愛麼个東西？到底想愛幾多？人盡心色，心肝大啊起來，麼个就想愛，望落雨又望好天、望賺錢又望輕鬆、望開發又望破壞少。人敢有恁大个才調，項項就得著？當然無可能啊！有睺過天災人禍个人就知，人生做得平安順序就係最大个幸福，會知足正會儆惜萬物，環境正會好。相信，人知足後，到時落雨天摻好天自然會分較勻，毋使再過輒輒望落雨又望好天。

作者：林伯殷

### ☆詞彙學習☆

- |                            |                           |
|----------------------------|---------------------------|
| 【棧食糧】zan` shed liong：儲存糧食。 | 【有成時】rhiu` shang shi：有時候。 |
| 【若係】na` he`：如果。            | 【心色】sim` sed`：有趣。         |
| 【罅囵】la` fud：吃力的樣子。         | 【才調】coi tiau`：才幹。         |
| 【變性】bien` sin`：性格改變。       | 【順序】shun` si`：順利。         |
| 【賴人】lai` ngin：誣賴人。         | 【儆惜】kiang` siag`：愛惜。      |

### ☆文法學習☆

- 【變去變轉】bien` kiu` bien` zhan`：變來變去。「V去V轉」字面義是去了又回，指動作來回反覆，例如：「提去提轉（拿過去又拿回來）」、「倒去倒轉（來來回回）」。有時也不限於空間上的動作位移，例如：「想去想轉」，指再三思考；「講去講轉」，指言語反覆敘說等。